



Justice Facility  
A Bilateral Co-  
operation between the  
Governments of Timor-  
Leste and Australia



## JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

*Rua setubal Colmera Dili, Timor Leste*

*Po Box 275, Telefone: 3323883, [info@jsmp.minihub.org](mailto:info@jsmp.minihub.org)*

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

### **Maioria Membru Parlamentu Nasionál Propoin Altera kriausaun ba Estatutu Rejiaun Oe-cusse Ambeno iha Espesialidade**



Maioria membru Parlamentu Nasionál tantu husi Bloku Koligasaun Maioria Parlamentár nomós opozisaun Fretilin propoin tenki altera proposta Lei Nú 12/III (2<sup>a</sup>) kona-ba kriausaun Estatutu Rejiaun Oe-cusse Ambeno iha diskusaun espesialidade. Proposta alterasaun ne'e hato'o tanbá konsidera artigu lubuk ida husi proposta lei ne'e inkonstitusionál. Pozisaun membru parlamentár sira ne'e hato'o durante diskusaun no aprovasaun iha plenária jeneralidade, iha lora 12 Maiu 2014. Aprovasaun iha jeneralidade ne'e pasa ho votus afavór 56 no absteinsaun 1.

Membru parlamentu sira kestiona priviléjiu ne'ebé sei fó ba Prezidente de Autóridade ZEESM tuir artigu 14<sup>o</sup> alinea 3, ne'ebé define katak tenki hanesan ho titular husi órgaun soberanu sira, afinal ZEEMS iha hala'o nia funsaun submete ba Primeiru Ministru.

Pozisaun membrus Parlamentár nian ne'e reforsa ho relatóriu pareser husi Komisaun A ba asuntu Konstituisaun, Justisa, Administrasaun Públiku no Anti-Korrupsaun, ne'ebé propoin elimina artigu 36<sup>o</sup> kona-ba revizaun ba proposta lei ne'ebé la fó kompetensia ba Parlamentu Nasionál atu prezenta proposta alterasaun hodi fó de'it ba governu no Rejiaun Administrativa Espesial Oe-cusse Ambeno.

“JSMP enkoraza Parlamentu Nasionál atu ezerse sira nia kompênsia atu asegura katak polítika hotu-hotu ne’ebe produz tenke refléta no konsistente ho regra konstitusionál sira ne’ebé eziste. Se ida ne’e la akontese, ita nia estadu bele hatur iha risku nia laran,” dehan Diretór JSMP Luis de Oliveira Sampaio.

JSMP hanoin katak realmente prezensa lei ida ne’e importante duni tanbá sei fó oportunidade ba povu iha rejiaun refere no povu Timor Leste iha jerál. Maske nune’e, tuir JSMP katak esforsu no politika ba dezvoltamentu nasionál hotu-hotu tenke realístiku no tuir prinsípiu komún sira ne’ebé konsagra iha ita nia konstituisaun.

Objetivu jerál husi lei ne’e rasik atu regula estatutu administrativu rejiaun especial Oe-cusse Ambeno ho ninia rejime jurídiku, prinsípius, modelu autonomia no órgaun administrativu inklui hatuur mós illa Ataúro nu’udar komplementa ba Rejiaun Administrativa Especial Oe-cusse Ambeno iha área turismu. Lei ne’e rasik sei sai hanesan baze fundamentu ba kriaun ZEESM (Zona Especial ba Ekonomia Sosial ba Merkadu) ne’ebé sei kria iha 2015.\*\*\*



### **Tribunál Distrital Oe-Cusse kondena pena efetiva tinan ida prizaun hasoru autór kazu violénsia doméstika: pasu pozitivu ida tan iha implementasaun LKVD**



Iha loron 06 fulan Maiu 2014, Tribunál Distrital Oe-cusse kondena arguidu AO ho pena prizaun efetiva tinan ida, tanba provadu komete krime ofensa ba integridade fízika simples hasoru nia feen no oan. Kazu ne’e akontese iha 28 Agostu 2013, iha Pante Makasar, Distritu Oe-Cusse.

Antes ne’e, iha 09 Abril 2013, tribunál kondena ona arguidu ho pena prizaun fulan 9 suspende ba tinan 2 tanba komete krime ofensa ba integridade fízika

simples hasoru nia feen.

*“Desizaun tribunál ho pena prizaun efetiva ba kazu violénsia doméstika manifesta sentidu pozitivu no progresu iha implementasaun Lei Kontra Violénsia doméstika. JSMP fiar katak desizaun ne’e bele fo*

*efeitu disuasivu (efek jera) ba arguidu no ba comunidade enjeral,”* dehan Direktor Ezekutivu JSMP Luis de Oliveira Sampaio.

JSMP enkoraza tribunál atu kontinua aseguara justisa ba krime sira ho natureza violénsia doméstika atraves husi sentensa sira ne'ebe tribunál hatun tuir krime ida-idak nia natureza, gravidade no tendensia ne'ebé akontese iha ita nia sosiedade. JSMP rejista katak krime violénsia doméstika mak krime ne'ebé maioria julga iha tribunál sira hotu-hotu iha Timor Leste. Tanba ne'e, tenke iha mekanismu atu kontrola fenomena hirak ne'e, atraves husi sistema justisa formal ne'ebé iha aleinde, mekanismu sira seluk.

Iha kazu ne'e, Ministériu Públiku akuza katak iha 28 Agostu 2013, oras tuku 01:00 kalan, arguidu tuku dala ida iha vítima nia rentos no buti vítima ninia kakorok, no basa arguidu nia oan dala ida. Kazu ne'e akontese tanba vítima toba no la hader atu prepara hahan ba arguidu. Aleinde ofensa sira hirak ne'ebé arguidu halo ne'e, arguidu mós tolok vítima.

Ministériu Públiku akuza arguidu kontra artigu 145 Kódigu Penal konjugadu ho Lei Kontra Violénsia Doméstika.

Iha prosesu julgamentu arguidu deklarara katak nia arepende ba ninia hahalok ne'ebé nia komete hasoru vítima sira.

Iha alegasaun finál, Ministériu Públiku husu ba tribunál kondena arguidu pena prizaun, minimu loron 30 no maximu tinan tolu, tanbá arguidu komete krime ne'e durante serve/hala'o pena suspensaun ne'ebé antes ne'e tribunál aplika ona ba arguidu.

Iha parte seluk defeza iha ninia konkluzau husu ba tribunál atu fo justisa ba arguidu tanba konfesa no arepende ninia hahalok.

Julgamentu preside husi juis singulár, Dr. João

Ribeiro, Ministériu Públiku, Dr. Afonso Lopes, no arguidu hetan defeza husi Dr. Afonso Gomes de Fatima husi Defensoria Públiku.\*\*\*



**Eventu sira tuir mai :**

- Iha 14 Maiu JSMP liu husi Unidade Observasaun Parlamentár, sei fasilita treinamentu ba Lider Komunitaria kona-ba ‘Demokarasia no Prosesu halo lei iha Distritu Liquiça;
- Iha 15 Maiu JSMP liu husi Unidade peskizador Júridiku no Relasaun Publiku, sei fasilita trenamentu kona-ba ‘Justisa ba ema hotu’, iha Distritu Liquiça;
- Iha 19 Maiu JSMP liu husi Unidade peskizador Júridiku no Relasaun Publiku, sei fasilita trenamentu kona-ba ‘Justisa ba ema hotu’, iha Distritu Liquiça.\*\* \*

JSMP enkoraza ita boot sira atu vizita website JSMP iha: [www.jsmp.tl](http://www.jsmp.tl) atu lee relatóriu foun JSMP kona-ba Obsersaun Jerál Setór Justisa tinan 2013 no Relatóriu Asesu ba Jutisa no Kapasidade Instituisaun Judisiáriu sira iha Timor Leste. Ita boot sira mós bele akompaña prosesu kazu sira iha tribunál distritál sira hotu, atraves husi publikasaun sumáriu kazu JSMP nian.\*\*\*